

# KvK tin speransa cu den 2025 por bay back na acceso di registro digital gratis



**Aña pasa den luna di maart Camara di Comercio y Industria di Aruba (KvK) a anuncia su decision di limita acceso gratis na informacion di su registro comercial y a pasa over na un sistema di cobranza pa duna informacion digital. E anuncio aki a trece pregunta y hasta malcontento di algun banda. Director di KvK, Martijn Balkestein, ta duna un actualisacion tocante e situacion y e posibilidad cu lo bay back na brinda informacion digital gratis.**

E tema di pago pa acceso ta keda uno cu hopi den comunidad ta critica, pero asina mes, ya caba tanto banconan, oficianan di abogado y hasta departamentonan di Gobierno cu mester di informacion ta haciendo uso di e servicio di abono, cu ta permiti acceso na e registro.

Despues di casi un aña cu KvK a haci e anuncio aki Bon Dia Aruba a tuma contacto cu Sr. Balkestein pa puntra un actualisacion. Segun informacion KvK tambe ta di

opinion cu usuarionan mester por wak e registro online gratis. A puntra Balkestein si ta trahando riba esaki, ki esfuersonan ta realizando pa logra esaki y si tin un fecha cu esaki lo keda cla.

Den su contesta el a splica cu pa ley KvK mester registra tur compania cu ta economicamente activo. El a sigui splica cu KvK mester tambe controla y implementa tur e cambionan relata na negoshi. Ademas e organisacion mester haci esey pa e 1,874 stichting, pa tur vereniging y recientemente tambe pa tur e UBO's.

El a indica cu KvK no ta ser subsidia door di gobierno, "net nada, kiermen nos mester paga tur cos for di e jaarlijkse bijdrag y benta di uittreksels." Balkestein a señala cu e prijsnan pa e jaarlijkse bijdrage y uittreksels no a cambia desde aña 2009, pero inflacion si a subi cu 21% desde aña 2009, locual ta nifica cu nan tin hopi mas gasto, pero no por aumenta nan entrada pasobra minister mester aproba esey y minister no a aproba nada ainda.

El a splica cu nan sistema digital ta algo pa facilita tur hende, y no ta algo cu ta stipula den ley. El a sigui splica cu nan sistema digital ta costa mas o menos 450 mil florin pa aña cu ta inclui aspectonan di almacenamiento, security, mantencion, cambio, entre otro. Sin placa e otro opcion lo ta descontinua e servicio di sistema digital.

Pa no mester recurri na esaki,



Balkestein a indica, nan ta cobra un suma chikito pa wak cierto dato. Esaki tambe ta e caso na KvK Bonaire, Sint Maarten y Hulanda, pero e diferencia ta cu prijs cu KvK Aruba ta cobra ta mas abou, y cierto informacion digital toch ta keda gratis. Ademas inzag na KvK semper ta keda por nada.

"Nos prijsnan ta mas abou anto cu servicio di otro KvK's, y ta importante pa inverti den e sistema digital pa percura cu e datos ta keda safe, bon proteha contra cyber attacks," el a bisa.

Pa loke ta e posibilidad cu lo bay bek na un registro di informacion digital gratis,

Balkestein a splica cu nan tabata den proceso pa negocia cu minister di Asuntonan Economico pa aumenta nan entrada, y asina consecuentemente por habri nan digital database atrobe. Pero gobierno a cay, y negociacion a para pasobra minister a bira demisionario. El a indica cu na momento cu tin un minister di Asuntonan Economico, cu no ta demisionario, e nan lo bay bek na e tema aki.

Den un articulo anteriormente publica den Bon Dia Aruba, tanto director di KvK como presidente di KvK, Diederik Kammerling, a expresa nan deseo pa habri e sistema na forma gratis.

Nan ta indica cu for di 2022 ta tratando pa haya luz berde di Minister Geoffrey Wever pa por hisa e contribucion di negoshinan, algo cu e Minister a keda rechasa regularmente. Riba dje, Camara di Comercio tabata trahando cu un ley bieu cu finalmente a keda adapta, sinembargo sin e areglo financiero nobo.

Tanto Kemmerling y Balkestein ta bisa di ta kere den transparencia y e speransa ta cu por bolbe habri e sistema na forma gratis pa comunidad. Segun ambos, Minister Wever tambe ta pensa mescos y den principio a bay de acuerdo pa cambionan, "pero e ta demisionario. Nos ta kere cu pa 2025 lo por logra y facilita informacion na comunidad," Balkestein a agrega. "Esey ta logico, pero ta importante pa

realisa cu e ta costa."

Segun nan e intencion ta pa aumenta e contribucion di negoshinan cu 20 florin cu tabata den e proposicion di 2019 tempo cu a ahusta e ley.

E proposicion ta pa bin un sistema manera na Hulanda y Boneiro, unda tin un asina yama 'flex rate' basa riba e estructura huridico di un negoshi, pa elimina e discusion riba capital cu a hinca den e empresa.

Esaki ta nifica tambe cu e nivel di contribucion lo ta basa riba e cantidad di ora di servicio cu trahadonan di Camara di Comercio ta dedica na establecimiento di empresanan individual. "E prijs mester refleha e cantidad di trabou di Camara di Comercio," Balkestein ta kere.

E ley cu ta dirigi Camara di Comercio ta papia cu e instituto mester percura cu su clientenan por haya acceso na informacion y no cu mester duna acceso digital.

Segun e 'Landsverordening op de Kamer van Koophandel en Nijverheid' (AB 1990 no. GT29), KvK por cobra sumanan adicional pa e servicionan extra cu KvK ta brinda, e.o. por cobra un suma pa consulta e Registro Comercial online, y un suma adicional riba e tarifa di 15 florin stipula den ley pa e traduccion di e uittreksels.

